



Utoqqaat illersuisuata paasisassarsiorluni Uper- navimmut angalaneranit nalunaarusiaq



1. Aallaqqaasiut

Utoqqaat illersuisuat Upernavimmi utoqqaat atu-gaat misissorniarlugit 2022-mi siullermeerluni paasi-sassarsiorluni Upernavimmut angalavoq. Paasisassar-siorluni angalaneq ulluni 17. maajimit 22. maajimut 2022 pivoq, tassani utoqqaat angerlarsimaffiat in-nuttaasullu ataasiakkaat angerlarsimaffiannut ilaati-gut pulaarpakka innuttaasunillu ataatsimiititsillu-nga.

Upernavimmi Katersortarfimmi innuttaasunik marlo-riarluta ataatsimiititsivugut. Upernavimmi katersor-tarfimmi ulluni 18. maaji aamma 21. maaji ataatsi-miititsinerni utoqqaat qanigisaallu ataasiakkaarlugit katersortarfimmi inatsisitigut siunnersorneqarnis-saannik periarfissippavut, taamatutaaq Upernavim-mi utoqqaat illuanni najugaqartunik ulluni 18. maaji aamma 21. maaji 2022.

Upernavimmi innuttaasunit utoqqarnit naammagit-taalliuteqartunit arlalinnit saaffigineqartarsimavu-nga 2021-mi ukiamiit. Tamanna tunngavigalugu Upernavimmi utoqqaat atugaat aamma ingerlatsi-viup utoqqaallu angerlarsimaffiata suliassanik suli-arinnittarnerat sukumiinerusumik misissorniarlugu paasisassarsiorlunga angalanissaq aalajangiuppara. Upernavimmi Ilaqutariinnik sullissivimmi immikkoor-tortaqaarfimmi aqutsisoq oqaloqatigaara, aamma utoqqaat angerlarsimaffianni pisortaq utoqqaat angerlarsimaffiani pissutsit pillugit oqaloqatigaara.

Minnerunngitsumik utoqqaat angerlarsimaffianni najugaqartut aamma innuttaasut utoqqaat nammin-neq illuminni najugaqartut qanigisaallu oqaloqati-gaavut. Avannaata Kommuniani Ilaqutariinnut Ingerlatsivimmi pisortaq paasisassarsiorluni angala-nermi paasisakka takusakkalu pillugit oqaaseqaate-qarnissaanut periarfissippara.

Paasisassarsiorluni angalanermi peqataapput Utoq-qaat Illersuisuat Inga Egede aamma inatsisileritooq Najattaaq Mathiasen.

Upernavimmi paasisassarsiorluni angalanerup ilaatut Kullorsuarmukartussaagaluarpugut piareersarsima-galuarlutigulu. Kullorsuarmi pujornera pissutigalugu angalanissaq taamaatinneqarpoq, taarsiullugulu angalanissamut pilersaarutit allanngortippavut Ilu-lissanullu 22. maaji 2022 aallarluta tassanilu unnui-vugut ullorlu ataaseq Ilulissaniillunuk. Ulloq 23. maaji 2022 ullaakkut Ilulissani utoqqaat angerlarsi-maffianni Unganartumi najugaqartut pulaarpavut.

Utoqqarnik sullissinermut pisortaq aamma BSU-mi sulianik suliarinnittartoq ulloq taanna ullaap tungaa ataatsimeeqatigaavut. Utoqqaat Illersuisuata Ilulis-sani innuttaasut utoqqaat ualikkut naapippai aam-malu Ilulissani kulturip illorsuani Sermermiuni ataa-siakkaarlugit inatsisitigut siunnersorneqarnissaannik periarfissillugit.



2. Paasisassarsiorluni angalanissap piareersarnera

Upernavimmut angalannginninni Avannaata Kommuniani utoqqarnik sullissinnermut aqutsisut arlallit paasisassarsiorluta angalanissatsinnik ilisimatinniarlugit oqarasuaatikkut oqaloqatigaakka. Tamatuma kingorna apeqqutit utoqqaat angerlarsimaffianni aqutsisumut aamma Upernavimmi Ilaqutariinnik Sullissivimmi aqutsisumut ulloq Juulip 7-ani 2022 nassiuppakka aamma apeqqutit Avannaata Kommuni Utoqqarnik Isumaginninnermut pisortamut

juunip 3-ani 2022 aamma juunip 6-ani 2022 nassiullugit. Utoqqaat angerlarsimaffianni aqutsisumit oqaasiinnartigut juulip 6-ani 2022 akineqarpunga aammalu Upernavimmi Ilaqutariinnik Sullissivimmi immikkoortortaarfimmi aqutsisumit ulloq juulip 6-ani 2022 aamma Utoqqarnik Isumaginninnermut pisortamut juunip 3-ani 2022 aamma juunip 6-ani 2022 allaganngorlugu akineqarlunga.

3. Utoqqaat angerlarsimaffiannut paasisassarsiorluni pulaarneq

Utoqqaat angerlarsimaffiannut ulloq maajip 18-ani 2022 nal. 13:00-miit 16:00-imut siullermeerluta pulaarpugut, tassani najugaqartut inimi kaffisortarfianini suliatinnik saqqummiivunga. Najugaqartut quliniit aqqaneq marluk akornanni amerlassuseqartut ataatsimiinnermi peqataapput, tassani Utoqqaat Illersuisuattut anguniakkakka suliasakkalu pillugit utoqqaat angerlarsimaffianni najugaqartunut oqaluttuaraakka.

Utoqqaat angerlarsimaffianni najugaqartut tamatu-

ma kingorna utoqqaat angerlarsimaffianni atukkatik pillugit oqaaseqarnissamut periarfissaqarput.

Utoqqaat angerlarsimaffianni najugaqartut kingusinnerusukku Utoqqaat Illersuisuata inatsisilerituunin, Najattaaq Mathiassemit, sulianik inatsisitigut tungassuteqartunik siunnersorneqarnissaminnik periarfissinneqarput. Utoqqaat angerlarsimaffianni najugaqartut tallimat-arfinillit periarfissaq taanna atorpaat.

4. Upernavimmi utoqqaat angerlarsimaffianni pissutsit

Utoqqaat angerlarsimaffiat illuuvooq pisoqaaq 1988-imi sananeqartoq. Illulu ukiuni 34-ni atuunnikummat najugaqartut inaasa, igaffiup, errorsisarfiup, allaffiit illumilu ataatsimut init nungullarsimanerat pisoqalisi-manerallu takuneqarsinnaavoq. Upernavimmi utoqqaat angerlarsimaffiat iluarsaanneqarsimanngilaq, illup 1988-imi sananeqarnerata kingorna annikitsumik iluarsaassinerit eqqaassanngikkaanni.

Utoqqaat angerlarsimaffiata eqqaani illup ilassutis-saa maannakkut sananeqarpoq, illumilu nutaami najugaqartussanut puigortunngortunut aqqaneq marlunnut inissaqartitsisoqassooq. Pilersaarutaavoq illu nutaaq 2023-imi aasakkut naammassineqassasoq.

Upernavimmi utoqqaat angerlarsimaffianni innuttaasunut 22-inut inissaqarpoq, utoqqaallu angerlarsimaffianni



marlunnik quleriilimmi maannakkut najugaqartut 19-iupput. Ineeqqanit 22-usunit pingasut marluut-tariaapput aappariinnut naatsorsuussat.

Upernavimmi utoqqaat angerlarsimaffianni maannakkut najugaqartut 19-iusunit 18-it Upernaviup eqqaani nunaqarfinneersuupput.

Qulaani najugaqartut arfineq pingasuupput, taak-kunanga najugaqartut tallimat-arfinillit issiavinnik kaassuartaakkanik rollatorinillu atuisuupput. Ataani najugaqartut aqqaniliupput, tamangajammik pui-

gortunngorsimanermik annernerusumik minnerusu-milluunniit takussutissaqartut.

Upernavimmi utoqqarnit utoqqaat angerlarsimaffianniittunit qulinit-aqqanilinnit, najugaqartut arfineq marluk-arfineq pingasut Upernavimmi peqqis-saavimmi puigortunngorsimanermik misissuariaatsi-mik Rudas-imik taaneqartartumik misissuivigineqar-simapput. Puigortunngorsimasut Dronning Ingridip napparsimavissuani Nuummi MR-scannertissiman-ngillat.¹

5. Utoqqaat Illersuisuata Upernavimmi utoqqaat angerlarsimaffiannik nalinginnaasumik isiginninnera naliliineralu

Utoqqaat Illersuisuata malugaa utoqqaat, utoqqaat angerlarsimaffianni najugaqarnerminnik naammagisimaarinnippasissut, sulisullu paaqqinnittut suliaort-tuaannarnermikkut takkununga toqqissisimatitsi-sut. Upernavimmi utoqqaat angerlarsimaffianni ami-gaataasut najugaqartunut killilersuipput, amigaa-taasut peqqutigalugit utoqqaat anisinnaanngimma-ta. Ulloq 18. maaji 2022 ataatsimeeqatigiinnermi utoqqaat oqaatigaat elevatorip biilillu kivittaataata qaqugu iluarsaanneqarnissaannik piffissaliisoqan-ginnerata toqqissisimatinngikkaatsik, tassa eleva-toreqartinnagu biileqartinnagulu utoqqaat anger-larsimaffiata avataanut nikissinnaannginnamik.

Sulisunik paaqqinnittunik ilaatigut amigaateqartar-nerup utoqqaat najugaqartut, utoqqaat angerlarsi-maffiannik ajortumik isiginnilersissinnaasarpaat. Na-jugaqartut utoqqaat angerlarsimaffianni inissaqar-tinneqarnerminnik nalinginnaasumik naammagisi-maarinnipput, nunaqarfimmiulli Upernavimmut nuuttut ilaquttatik maqaasivaat kiserliortutullu misi-galutik.

Najugaqartut naliliineralu malillugu utoqqaat anger-

larsimaffianni assuarnartunik arlalinnik amigaate-qarpoq. Pineqartoq tassaavoq elevatorip ajoqutillip iluarsaanneqannginnera, tamatumalu kinguneraa is-siavinnik kaassuartaakkanik rollatorinillu atuisut taa-maallaat qullermi inigisaminniiginnarsinnaanerat. Utoqqaqarpoq illumit anisinnaanngitsunik silaanna-rissarniarlutillu taamaallaat qullermi aneersuatar-fimmut anisinnaasunik. Pingaartumik najugaqartut issiavinnik kaassuartaakkanik atuisut biilip kivitsissu-taata ajornerannik eqqorneqarput, tamannalu pis-sutigalugu ukioq ataaseq sinnerlugu mattusimane-qarsimapput.

Najugaqartut arlallit utoqqaat angerlarsimaffianni siarngup ajornera ernummatigalugu naammagina-gulu oqaatigaat, tassa najugaqartut arlallit nukil-laarnermik eqqugaasimapput taamaattumillu nikis-sinnaanatik, ataaserlu uummalluttuulluni. Malugi-niarpara amigaat taanna erloqinartuusooq, tassa na-jugaqartut nikissinnaanngitsut ikiorneqarnissamik pisariaqartitsigaangata sulisut paaqqinnittut tusaa-sinnaanngimmatigit. Utoqqarnik sullissinermut pi-sortaq amigaat taanna iluarseqqullugu attavigine-qarpoq.

¹ MR scanning: "Magnetisk Resonans scanning" – saviup kajungerisaanik sakkortuumik atortulimmik assiliissut, inuup aqinneraani nappaatinut misissuutigineqartartoq –
Uani link takuuk: <https://www.sundhed.dk/borger/patienthaandbogen/undersogelser/undersogelser/mr/mr-skanninger/>



Biilip inunnik ingerlatsissutaasup issiavinnik kaas-suartakkanik rollatorinillu atuisunik angallassissutaa-sartup, kivittaataa maannakkut ukioq ataaseq sin-nerlugu ajorpoq. Tamanna utoqqaat angerlarsimaf-fianni najugaqartut illoqarfimmi ilaqtutaminukar-sinnaannginnerannik allanilluunniit pisassaqlutik illoqarfiliarsinnaannginnerannik kinguneqarpoq. Taamaammat illoqarfiliaanneqarnissaminnik atorfis-saqartitsigaangamik allat ikiuunnissaat ajunngisaar-nerallu isumalluutigisarpaat.

Qulaaniittup iluarsineqarnissaa pillugu utoqqaat angerlarsimaffianni aqutsisoq attavigineqarpoq, ta-kuuk immikkoortoq 15, immikkoortut pingajuat. Utoqqaat angerlarsimaffiata biilia ajortoq iluarsiivi-gineqaqullugu utoqqarnik sullissinermut pisortaq aamma attavigineqarpoq. Takuuk immikkoortut 6.d: "Biilip inunnut ingerlatsissutip kivitsissutaa ajortoq." aamma 11. a, ataani immikkoortoq "Biilit".

Upernavimmi nunap ilusaa innaaqqissunik qaarso-qarpoq illoqarfimmilu atortulersuutit tamatuminnga sunnerneqarput, sivingasunik aqqusineqarnera utoq-qarnit innuttaasunillu allanit pitsorluttunit ingerla-vigiuminaassisippaa. Upernavimmi taxaqqanngilaq, utoqqaallu angerlarsimaffiata biilituaa ajoraangat Upernavimmi utoqqaat angerlarsimaffianni najuga-qartut anisinnaanngivissortarput. Utoqqaat qanigi-saat ilisarisimasaalluunniit biileqanngikkaangata su-linermulluunniit atatillugu biileqanngikkaangata il-loqarfimmi angalasinnaanngillat.

Utoqqaat Illersuisuat naliliivoq biilimik amigaate-qarneq angisuumik kinguneqartoq, tassa utoqqaat inuttut kiffaanngissusaannik killiliisumik utoqqaat angerlarsimafianni ineeqqaminniiginnartariaqar-tarannik kinguneqarmat.

Sulisunik isumaginnittunik igaffimmilu sulisunik oqa-loqateqarnikkut isumaqarpunga sulisut utoqqarnik najugaqartunik sullissinertik nuannarigaat utoq-qaallu pisariaqartitaannik isumassoraat. Aqutsisoq ukiorpassuarni sulliviminiissimavoq, suliniuteqar-luartuullunilu utoqqarnut najugaqartunut pitsaaner-paamik iliuuseqarusuttoq.

Utoqqaat Illersuisuat naliliivoq aqutsisoq utoqqaat angerlarsimaffianni atortut amigaataanerat eqqar-saatigalugu kommunimi ingerlatsivimmi qulliune-rusunit tapersersorneqarnissamik amigaateqartoq.

Sulisut paaqqinnittut aalajaatsuupput utoqqarnillu sullissinertik nalinginaasumik nuannaralugu, kisianni elevatorip ajornera, errorsiviit maskiinallu panersi-ivit, nillartaatsiviup siarngullu ajorneri pissutigal-ugit timikkut sullivimmi avatangiisit naammagittaal-liutigineqarput. Siuliani taaneqartut ukioq ataaseq sinnerlugu ajoquteqarsimapput, tamannalu kingune-qarpoq sulisut iganik angisuunik nerisassanik qalaar-tunik imalinnik utoqqaat illuanni allermiit qullermut ingerlassisariaqartarnerannik sulinermi ajoquseriaan-naallutik.

Init taalaartuupput kajuminnarpiaratillu, nalingin-naasumilli eqqiluutsuupput silaannarillutillu.

Utoqqaat Illersuisuat naliliivoq Avannaata Kommu-niani qullersat amigaatit maannakkumit siusinneru-ngaartumik iliuuseqarfigisariaqarsimagaluaaraat. Utoqqaat angerlarsimaffiat aseqqukumik kivittaa-tilimmik biileqarpoq, elevatori aseqqukuuvoq siar-ngillu aseqqukuullutik, nillartaatsivik errorsiviit ma-skiinalu panersiivik ilaatigut ukioq ataaseq sinner-lugu ajorsimapput.

Sulisunik oqaloqateqarnermi utoqqaat nikissinnaan-ngitsut oqimaatsut majuartarfitsigut kivillugit am-mukaattariaqartarnerat, igat oqimaatsut aamma atortut sulinermilu atortut oqimaatsut kivittariaqar-tarnerat pissutigalugu sulinermi ajoqusernissartik er-nummatigaat.



6. Utoqqaat angerlarsimaffianni amigaatinik nassuiaaneq

6.a. Elevatori ajortoq

Utoqqaat angerlarsimaffianni elevatorituaq najugaqartut sulisullu atorsinnaasaat ukioq ataaseq sinnerlugu atorsinnaasimanngilaq. Tamatuma kinguneraa utoqqaat pitsorluttut qullermi najugaqartut namminneerlutik nikissinnaannginnerat, iniminniiginnartariaqarnerallu.

Utoqqaat angerlarsimaffiata iluani ininut allanut ingerlasinnaanngillat, aammalumi sulisunit tummeqatigut sivingangaatsiartutigit qullermiit kivillugit ammukaanneqanngikkunik namminneerlutik allaat anisinnaanatik.

6.b. Siarngit ajortut

Utoqqaat angerlarsimaffianni siarngit najugaqartut marluk ataatsikkut sianerpata atorsinnaanngillat. Malugaara utoqqaat sulisunit ikiorneqartariaqaraangamik siarngit atorsinnaannginnerat ernummatigigaat. Ajoqut taanna pissutigalugu utoqqaat angerlarsimaffianni najugaqartut assersuutigalugu napparsimaleriataarneranni, sulisunit isumaginnittunit ikiorneqarnissaq pisariaqaraangat sulisut attaavigisinnaasanngilaat.

6.c. Errorsiviit, maskiina panersiivik nillataartitsivillu ajortut

Upernavimmi utoqqaat angerlarsimaffianni errorsiviit pingasuupput maskiinallu panersiiviit marluulutik. Errorsivinnit pingasuusunit marluk atorsinnaanngillat, utoqqaat angerlarsimaffianni ingerlatsisoq illumi angallassinermi taama nassuiaavoq. Najugaqartut errortassaataat pitsaanerpaamik errorsisarfimmi errorneqarneq ajorput utoqqaallu najugaqartut atisat errortat sivirusunerusumik utaqqisariaqartarpaat. Oqaatigissavara maskiinat ajornerat utoqqaat eqqiluisaarnerisa amigaateqarneranik kinguneqarsinnaasoq.

Maskiina panersiivik qaammatini tallimani-arfinilinni atorsinnaanngilaq, taamaammat utoqqaat atisaat oqorutaallu silami panerseqartariaqartarput.

Nillataartitsivik aamma aserorsimavoq taamaammallu atorsinnaanani. Utoqqaat angerlarsimaffianni aqutsisoq nassuiaavoq nerisassanut asiujasunut nillataartitsivimmi inissakinnerusoq.

6.d. Biilip inunnut ingerlatsissutip kivitsissutaa ajortoq


Utoqqaat angerlarsimaffiata biilituaa kivitsissutilik utoqqaat angerlarsimaffianni najugaqartunit sulisunillu tamanit atorineqartartoq 2021-imi upernaakkumiit atorineqarsinnaajunnaarpoq.

Taamaammat najugaqartut issiavinnik kaassuartakanik rollatorinillu atuisut pitsorluttut utoqqaat angerlarsimaffiannit aninissamut ukioq ataaseq sinnerlugu periarfissaqarsimanngillat. Utoqqaat meeqqaminnut inersimasunut illoqarfimmi najugaqartunut pulaarsinnaanngillat imaluunniit illoqarfimmi pisassaqlutik biilimik ingerlanneqarsinnaanatik. Biilip amigaataanerata utoqqaat illoqarfimmi angalaarsinnaanerata killeqartippaa.

6.e. Utoqqaat angerlarsimaffianni init iigai ininilu avatangiisit

Utoqqaat angerlarsimaffianni inini ataatsimoorussani soorlu nerisarfimmi kaffisortarfimmilu assinik qalipakkanillu nivingasoqarpiannngilaq. likkat piffissami sivirusumi qalipanneqarsimangitsutut isikkoqarput. Aqutsisoq nassuiaavoq utoqqaat angerlarsimaffiata iluani qalipaaneq pisariaqartitsisoqaleraangat utoqqaat angerlarsimaffiata iluata iluarsaannissaanut pilersaarummut atatillugu pisartoq.

Atugassaritinneqartut taakku Upernavimmi utoqqaat angerlarsimaffianni najugaqartut sulisullu ukiuni kingullerni atugarisimavaat.



7. Ulloq 21. maaji 2022 ataatsimeeqatigiinneq

Upernavimmi katersortarfimmi arfininngorneq ulloq 21. maaji 2022 aammaarluta ataatsimeeqatigiipugut. Upernavimmi katersortarfimmi ataatsimeeqatigiinnermi peqataasut ilagaat nakorsaq, Hanne Brandtbjerg, illoqarfimmi sivikitsumik nakorsaasoq.

Hanne Brandtbjerg uannik oqaloqateqarnermini ilisimatitsivoq Upernavimmi Peqqissaavimmi sulissusaaleqineq pissutigalugu 2022-mi sapaatit akunnerisa 24-annit taamaallaat ulluunerani ammasassasoq.

Utoqqaat Illersuisuata allattoqarfiani, Upernavimmi innuttaasumit saaffiginneq tunngavigalugu, utoqqaq puigortunngortoq utoqqaat angerlarsimaffianni inissaqannginneq pissutigalugu Peqqissaavimmi najugaqartoq ilisimavarput. Nuummot uternerup kingorna Avannaata Kommuniani nunap immikkoortuani nakorsamut Peter Vedstedimut ilisimatitsissut saqqummiuppara.

7.a Nunap immikkoortuani nakorsap akissutaa

Avannaata Kommuniani nunap immikkoortuani nakorsap Peter Vedstedip uppernarsarpaa Upernavimmi Peqqissaavik 2022-imi sapaatit akunnerisa 24-annit taamaallaat ulluunerani ammasassasoq. Nunap immikkoortuani nakorsaq ilisimatitsivoq innuttaasup utoqqaap puigortunngortup utoqqaat angerlarsimaffianni inissaqalernissami tungaanut, Peqqissaavimmi maannakkut najugaqarsinnaajunnaartup paarineqarnissaa isumassorneqarnissaalu kommunip akisussaaffigigaa.

Innuttaasup utoqqaap puigortunngortup inissisimamera Avannaata Kommuniani Ilaqutariinnut Ingerlatsivimmi pisortamut, Aviâja Madsenimut saqqummiuppara. Taanna akivoq:

- Suliaq inuk pillugu suliaammat apeqqtut akisinaanngilara.

Innuttaasup utoqqaap puigortunngortup pania kingusinnerusukkut 2022-imi juunip qaammataani, sianermat ilisimatitsillunilu ataatanik puigortunngortoq Upernavimmi utoqqaat angerlarsimaffianni inissaqalersoq, innuttaasup utoqqaap puigortunngortup inissisimaneranik paasitinneqarpugut.



8. Utoqqaat Angerlarsimaffianni najugaqartut pissutsit pillugit naammagittaalliutaat

Utoqqaat angerlarsimaffianni najugaqartut quliniit aqqaneq marlunnut peqataaffigisaannik kaffisortarfianni ataatsimeeqatigiinnermi pissutsit atugassari-tinneqartullu akueriuminaatsitatik najugaqartut oqaatigaat.

8.a. 2021-imi juunimiit utoqqaat angerlarsimaffianni anisimanngilanga. Taamatut sivilutigisumik anisinaannginnera nuanninngilaq. Aamma taamatut sivilutigisumik illup iluaniinneq kiserliornarpoq, tamakkuli inuunitsinni atugassarigatsigit pissutsit akueraakka, arnaq 82-nik ukiulik timimi nukillaarnera pissutigalugu issiviammi kaassuartaakkamiittoq oqarpoq.

8.b. Tamatuma kingorna najugaqartoq 82-inik ukiulik utoqqaat angerlarsimaffianni ineeraanut pequtegarpianngitsumut pulaarpara. Ilaqutaasa assii iikkami nivingapput.

- Najugaqartoq nunaqarfimmit Innaarsunninngaanneersoq Innarsuunni tamarmik najugalinnik tallimanik meeraqarpoq, aqqaneq marlunnik erngutaqarpoq qulingiluanillu erngutaqqiuteqarluni.

82-inik ukiulik Upernavimmi utoqqaat angerlarsimaffiannut 2021-imi nuutsitaavoq. Pineqartoq Upernavimmi ilaqutaqanngilaq taamaammallu qaqutigut pulaarteqartarluni.

- *Timima nukillaarnissaata tungaanut Innaarsunni najugaqarninni silamiittuaannarpunga. Taamaammatt Upernavimmi utoqqaat angerlarsimaffiannut nuutsinneqarnera aliasuutigaara, arnaq 82-inik ukiulik oqarpoq.*

8.c. Najugaqartut arlallit ikiortissarsiorlutik ataatsikut sianeraangata ineeqqaminni siarngit atorsinaannginnerat naammagittaalliutigaat. Tamanna najugaqartut ikiorneqarnissamik pisariaqartitsigaa-

ngamik ikiupallanneqarsinnaannginnerannik kinguneqarpoq.

- Sianeraangama sulisut takkutippallattannginnerat uummalluttuugama inuuninnik navianartorsiortitsisinnaavoq, arnaq 86-inik ukiulik uummallunnini pissutigalugu utoqqaat angerlarsimaffiannut nuussimasoq oqarpoq. Oqaluttuarpoq pisariaqaraangat ikiorneqarnissani pissutigalugu nuuttariaqarsimalluni.

- *Ulluni arlalinni napparsimavunga ineeqqaniillu 17-imit sianerlunga, akunnerup affaa sinnerlugu kinguneqanngitsumik sianeqattaarpunga, sulusunik ikiuisussanik takkuttoqanngilaq, angut 84-inik ukiulik Tasiusamit Upernavimmi utoqqaat angerlarsimaffiannut nuussimasoq nassuiaavoq. Perulunnartumik nappaateqarmat nunaqarfimmi kommunip ilaqutaasalu ikiorsinnaajunnaarmasuk utoqqaat angerlarsimaffiannut nuussimavoq.*

- *Sulisut paaqqinnittut siarngit tusaasinnaaneeraat paaserusuppara? Siarngit sulusunit paaqqinnittunit tusaaneqarneq ajorput iluarsaanneqartaratillu. Akileraartartutut aamma akileraartarama utoqqaat angerlarsimaffianni siarngit atorsinnaasariaqarput, uagut isumannaatsuunissarput eqqarsaatigalugu. Qineqqusaarutaannaasinnaanngilagut.*

Aamma elevatori amigaatigaarput, minnerunngitsumillu biili angallassissutaasartoq aseqqukuuvoq, illoqarfimmi taxaqanngilaq taamaammatt sumulluunniit nikeriarsinnaanngilagut.

- *Tasiusami utoqqarnik sullisserusuttoqanngilaq, aalisakkerivimmi sulerusunnerupput. Utoqqaat angerlarsimaffianni sulisut naammannersut ilinniagaqarsimanersullu paaserusuppara.*



9. Sulisunut sulinermi atugassaritineqartut suliffimmilu amigaatit



Utoqqaat angerlarsimaffianni igaffimmi errorsisarfimmilu sulisut arlaleriarluta oqaloqatigaavut, taakkulu utoqqaat angerlarsimaffianni sulinermi atortut asekkukut pissutigalugit timikkut sulinermi atugassaritineqartut ajortut pillugit oqaaseqarput.

Aajuku assersuutit:

1. Utoqqaat angerlarsimaffiata biilia kivittaatilik aserormalli ukioq ataaseq sinnerlugu qaangiute-reerpoq. Tamatuma kinguneraa najugaqartut pitsorluttut utoqqaat angerlarsimaffiannit ukioq ataaseq sinnerlugu anisinnaanginnerat.

Biili atorsinnaangitsoq utoqqaat angerlarsimaffiata silataaniippoq. Biili kivittaatilik issiavinnik kaassuartaakkanik atuisunut naatsorsuussaavoq ilaasunullu tallimanut-arfinilinnut inissaqarluni.

2. Utoqqaat illuanni elevatori ukioq ataaseq sinnerlugu atorsinnaasimanngilaq. Malugaara elevatori ukioq ataaseq sinnerlugu atorsinnaangimmat najugaqartut tallimat-arfinillit issiavinnik kaassuartaakkanik rollatorinillu atuisut utoqqaat angerlarsimaffianni inini qullerni najugaqartut ukioq ataaseq sinnerlugu aninissamut periarfisaqarsimanngitsut. Najugaqartut taakku silaannarissarniarlutik taamaallaat qullermi aneerasaartarfimmut anisinnaasarpud.

Majuartarfiit pineqartut issiaviit kaassuartaakkat kivinnissaannut sulisunut marlunnut-pingasunut naammattumik inissaqannngillat, sulisullu arlariilutik majuartarfitsigut issiaviit kaassuartaakkat amukaannissaat ajornakusoortittorujussuaat.

Sulisut utoqqaat qullermi ineqartut kivillugit ammaakaassisariaqartarnerat ukioq ataaseq sinnerlugu ingerlareersimavoq, utoqqaallu illuanni najugaqartut nerisinniarlugit igat angisuut naqqup-ataaniit ininut qullernut tigummiarlugit qummukaattariaqartarlugit.

3. Sulinermi atortut pisariaqartut 2022-ip aallartinneraniilli aserorsimappud, soorlu errorsivinnit pingasunit marluk asekkukuupput. Aamma maskiinaniit panersiivinnit marlunnit ataaseq aserorsimavoq. Nillartaartitsivik angisooq naqqup ataanittoq aamma atorsinnaangilaq.

Sulinermi atortut pisariaqartut illumit aneqqaarluni tikinneqarsinnaasumi naqqup-ataaniittut qaammaterpassuannngortuni aserorsimaneri utoqqaat illuanni igaffimmi errorsisarfimmilu sulisunut ajoqutaasorujussuupput.

4. Igaffik errorsisarfillu naqqup-ataaniimmata igat oqimaatsut kissartullu, errugassat, errortassat allarpassuillu ullormut amerlasooriarluta majuartarfikkut silamiittutigit tigummiarlutigit ukioq kaajaallallugu qummukaassuullutigillu ammu-kaassuttariaqartarsimavavut. Oqimaatsut kivillugit minnerpaamik 30-nik issittumi ullormut taamaannariarluta majuartarfitsigut qummukaattarneri ammukaattarnerilu igaffimmi errorsisarfimmilu sulisunut amerlanerpaanut tallitsigut, nissut-sigut naggussatsigullu anniartarnitsinnik kinguneqartarpoq.

- Tamanna peqqinnangitsorujussuuvoq sulinermilu atugaritineqartut ajortorujussuullutik, 40-inik ukiulik Anne Louise Dalager utoqqaat illuanni igaffimmi ikiortitut sulisoq oqarpoq.



10. Aqutsisumik oqaloqateqarneq

Najugaqartunik ulloq 18. Maaji 2022 ataatsimeeqateqarnerup kingorna ataani atsiortoq utoqqaat iluanni aqutsisumik, Sara Karlsenimik oqaloqateqarnissamut periarfissinneqarpoq. Aqutsisup ajornartorsiutit najugaqartunik ataatsimeeqateqarnermi saqqummertut itisilerpai.

Sara Karlsen nassuiaavoq inunnut biili kivitsissutilik 2021-imi upernaarnilli aserorsimasoq. Biili 2021-imi oktobarip tungaanut pisianik il.il. assartuinnermut atorneqarsinnaasimavoq, najugaqartulli ingerlannissaannut biilip atornissaa navianarpallaarmat najugartut ingerlannissaannut atorneerussimalluni.

- Biillimik pilersuisoq, Avannaata Kommunia aamma Isumaginninnermut Aqutsisoqarfik, biilip atorsinnaannginnera pillugu 2021-imi upernaakkut attavigaakka. Pilersuisup aamma Avannaata Kommuniani teknikkimut pisortaq arlaleriarluni attavigisarsimavaa. Biilimilli pilersuisup maajimi 2022 Upernavimmiinnermini nassuiaappaanga Avannaata Kommuniani teknikkimut pisortap biili pillugu saaffiginnissutigisartakkani akisarunaarai. Biili taamaammat ingerlasinnaanngilaq, Sara Karlsen nassuiaavoq.

10.a. Elevatori akuttunngitsumik aserortarpoq

Elevatori utoqqaat illuata atorneqaleranerani ukiut 30-it sinnerlugit atoreersimasoq pillugu utoqqaat iluanni aqutsisoq nassuiaavoq.

- Elevatori 2021-imi upernaakkut aserornissami tungaanut akuttunngitsumik aserortarpoq. Taamanikkulli atorsinnaanngilaq, tamannalu ajornartorsiutaasorujussuuvuq, inini qullerni najugaqartunut aninissaminnut periarfissaqanngitsunut, aamma najugaqartut allat peqatiginissaannut periarfissaqanngitsunut ajornartorsiutaaginnerani, aammali sulisunut nerisassanik, errugassanik erortassanik naqqup-ataani igaffimmit errorsisarfimmiillu oqimaatsut tigummiarlugit assartuisariaqartartunut, Sara Karlsen oqarpoq.

Sara Karlsen nassuiaavoq 2021-imi upernaami Nunap Immikkoortuani Avannaani Teknikkimut immikkoortortaqarfik elevatori pillugu nalunaarfisimagini aammalu VVS-imi suliffeqarfik aamma 2021-imi upernaakkut attaveqarfisimagini.

- Nunap Immikkoortua Avannaata elevatori pillugu 2021-imi upernaakkulli nalunaarfigaara aamma Isumaginninnermut Sulisoqarnermullu Naalakkersuisoqarfik ulloq 24. marts 2022 allaffigaara.

Aana Sara Karlsenip Avannaata Kommunianut aamma Isumaginninnermut Sulisoqarnermullu Naalakkersuisoqarfimmut allagaanik tigulaarineq (issuagaq tigulaagaavoq).

Issuaaneq: "Issiavinnik kaassuartakkanik atuisut inini qullerni najugaqartut allermukarlutik ataatsimut nerisarfimmukarsinnaanngillat. Nerisarfimmi neriniarlutik ataatsimullu aqqissuusinerni peqataaniarlutik ataatsimut inersuarmukarsinnaanngillat. Taamaammat inimi qullerni mikisuararsuarmi tattoqisaallutik nereqatigiitartup, allallu ineeqqaminni kisimiillutik nerisallutik toqqartarpaat.


Najugaqartut nakorsiaattussanngoraagatsigit sulisut arlallit majuartarfitsigut ammukaattariaqartarpaat. Sulisullu oqimaatsunik kivitsisariaqartarnerat isumannaatsuunissaq qissimigaa-raanni attanneqarsinnaanngilaq, ineqartunut sulisunulluunniit." Issuaaneq naavoq.

Sara Karlsenip APV-imi² immersugassaq ulloq martsip 24-ani 2022 immersorpaa. APV-imi immersugassaq Avannaata Kommunianut aamma Isumaginninnermut Sulisoqarnermullu Naalakkersuisoqarfimmut nassinneqarpoq.

Sara Karlsenip ataani atsiortoq tallimanngorneq ulloq 20. maaji 2022 aappasaanik alakkarnerani ilisimatippaa Ilulissani elevatorimut iluarsaasartumut attaveqarsimalluni.

- Elevatorimut kingoraartissanik maannakkut pilsarsisoqarmat Ilulissani iluarsaassisartup attave-

² Uannga naalisagaq: "Arbejdspladsvurdering" - "Sullivinnik nalilersuinerit". Inatsimmi allasimavoq sulliviit tamarmik atorfinitsitaqartut 1. januar 2009 aallartiffigalugu allasimasamik sullivinnik nalilersuinnermik - ulluinnarni APV-mik taaneqartumik - suliaqarnissaminnut pissaataitalissasut. Tigulaariffigineqartoq: <https://at.gl/arbejdspladsvurdering/>



qarfigaanga neriorsuivorlu kingoraartissat tiki-niariarpata elevatori iluarsaanneqassasoq. Nalua-ra kingoraartissai maajip naanerani umiarsuarmik siullermik kingusinnerusukkulluunniit tikiunne-qassanersut, Sara Karlsen ilisimatitsivoq.

10.b. Errorsiviit panersiiviillu

Errorisivinnit pingasuusunit marluk aamma paner-siivinnit marlunnit ataaseq atorsinnaangitsut nilla-taartitsivillu aamma atorsinnaangitsoq pillugit Sara Karlsen oqarpoq:

- Errorsiviit panersiiviillu 2022-imi upernaamili siu-sissumi aserorput. Taamammat nioqqutissanik pi-sinissamut missingersuutit sipporlugit atuisaria-qarsimavunga errorsivinnillu annertuunik error-sissutaasartunik nutaanik piniarlunga. Ilimagaara umiarsuarmik piaartumik tikiunneqassasut. Nilla-taartitsivik angisooq 2022-imi februarimili aseror-poq. Illoqarfimmi iluarsaassisartoqanngimmat nil-lataartitsivimmik angisuumik pisivunga, taannalu umiarsuit tikittussat siulliit ilaannit tikiunneqas-saaq.

10.c. Siarngit

Utoqqaat sulisunit ikiorneqarnissamik pisariaqartit-sigaangata siarngit pillugit utoqqaat illuanni aqut-sisoq oqarpoq:

- Siarngit pisoqaapput pitsaanerpaamillu atorsin-naanatik. Najugaqartut marluk ataatsikkut siane-raangata qulleeraq ikissinnaangilaq.

Sara Karlsen oqarpoq, taakku (Ilulissani Avannaata Kommuniiani Utoqqarnut Ingerlatsivik) Upernavimmi utoqqaat illuannut aningaasartuutissanik missinger-suusiortartut, takusinnaangikkaat nalullugulu mis-singersuusioreaangamik suut missingersuusiordfigine-qartarnersut.

- Taamaammat aningaasalersuinermt akisussaa-sut utoqqaat angerlarsimaffiannut aningaasar-tuutissanik missingersuusiuleraangamik missi-ngersuutissat kissaativut arajutsikkajuttarpat, Sara Karlsen oqarpoq.



11. Avannaata Kommuniata biilitaarnissaq elevatorimullu kingoraartissanik pissarsinissaq suliniutigaa

Utoqqaat Illersuisuat Upernavimmi utoqqaat angerlarsimaffianni pissutsit pillugit Avannaata Kommuniannut allakkatigut apeqquteqaateqarpoq.

Apeqquteqaatilli Ilaqutariinnut Ingerlatsivimmi pisortamut, Aviâja Madsenimut, nassiutinnginnerini Upernavimmi utoqqaat angerlarsimaffianni pissutsit Upernavimmi ilaqutariinnut immikkoortortaqarfimmi aqutsisumut Lydia Knudsen Løvstrømimut saqqummiuppavut. Lydia Knudsen Løvstrøm tallimangorneq ulloq 20. maaji 2022 oqaloqatigaarput.

11.a. Biilit

Utoqqaat angerlarsimaffianni biilit ukioq ataaseq aseqqukooreersut sooq taarserneqarsimannginnerat pillugu apeqqummut Lydia Knudsen Løvstrøm akivoq:

- Utoqqaat illuata biilii aserormata ajornartorsiummut aaqqiissutissamik nassaarniarluta utoqqaat angerlarsimaffianni aqutsisoq oqaloqatigaarput. Immikkoortortaqarfitsinni biilimut nutaamut akissaqannginnatta ajornartorsiut Upernavimmi innuttaasunut ingerlatsivimmi aqutsisumut saqqummiuppavut, taassumalu Avannaata Kommunianni kommunip Teknikkimut Ingerlatsivianut aningaasanik qinnuteqarnissatsinnik innersuuppaatigut.

Kingullertut taaneqartoq akivoq teknikimi nutaanik pisiniutissaqartoqanngitsoq aningaasasaqartinneqanngimmata. Tamatuma kingorna Avannaata Kommunianni Ilaqutariinnut Ingerlatsivimmi pisortamut, Aviâja Madsenimut saaffiginippugut.

Ilaqutariinnut Ingerlatsivimmi pisortaq, Aviâja Madsen ulloq 3. juuni 2022-imi malikkut akivoq, utoqqaat illuat sukanerpaamik biilitaartinneqassasoq.

- Utoqqaat angerlarsimaffiata biilitaarnissaa eqqarsaatigalugu, biilimik nutaamik pissarsinissaq sulissutigaa. Sumiiffinni isorliunerusuni ase-

rortoqaraangat illoqarfimmit allamit nunaniluunniit allanit atortussanik akuttunngitsumik pissarsariaqartaratta suliassaq piffissami sivisuumi aaqqinniartariaqartarparput, Aviâja Madsen allappoq.

11.b. Elevatori

Utoqqaat illuanni elevatori 2021-imi upernaakkulli aserorpoq. Utoqqaat illuanni elevatorip iluarsaanis-
saanut sooq iliuuseqartoqarsimannginnera pillugu apeqqummut Lydia Knudsen Løvstrøm akivoq:

- Najukkami aqutsiveqarfitsinni aningaasanik atuinissamut periarfissaqanngilagut, pisumi tassani ajornartorsiut aaqqinniarlugu aamma innuttaasunut ingerlatsivimmi aqutsisumut, Sulianut pisortamut aamma Avannaata Kommunianni Ilaqutariinnut Ingerlatsivimmi pisortamut ajornartorsiut saqqummiuppavut.

Upernavimmi utoqqaat illuanni elevatori qaqugu iluarsanneqarnissaa pillugu, Aviâja Madsen ulloq 3. juuni 2022 e-mailikkut akivoq.

- Upernavimmi utoqqaat angerlarsimaffiata illutaa pisoqaavoq, taamatuttaaq elevatori taama pisoqaatigimmat kingoraartissanik pissarsinissaq ajornakusoorpoq. Kingoraartissat maannakkut pissarsiarineqarput, kingoraartissallu taakku Upernavimmut anngunneqarnissaat maannakkut utaqqivavut. Naatsorsuutigaaq elevatori qaammatini aggersuni atorsinnaalissasoq. Aamma illumut ilassummut elevatorimik nutaamik pilersitsiniarsarivugut.

11.c. Errorsiviit panersiiviillu

Aviâja Madsen aamma ilisimatitsivoq errorsiviit anertuunik errorsissutaasinnaasut nutaat, panersiivik nillataartitsivillu nutaaq anngutereersut ikkussuuteriaannaasullu.



11.d. Siarngit

Ilaqutariinnut Ingerlatsivimmi pisortaq, Aviâja Madsen siarngit atorsinnaannginnerat pillugu apeqqummut oqarpoq:

- Siarngit ulluinnarni atorsinnaagaluarput, taamaallaat atuisut marluk siarngit ataatsikkut too-

raangatigit qulleerartaat ikinneq ajorput. Taamaammaat siarngit taarserneqanngippata siarngit pitsaanerpaamik atorsinnaasanngillat. Taamaattumik Upernavimmi utoqqaat angerlarsimaffianni siarngit tamaasa taarsersorneqarnissaat anguniarlugu teknikkimut avatangiisunullu immikkoortortaarfik suleqatigaarput.

12. Utoqqarnut ilaqutaannullu katersortarfimmi ataatsimiititsineq

Utoqqaat ilaqutaallu katersortarfimmi pingasunngorneq ulloq 18. maaji 2022 nal. 15:00-imiit 17:00-imut ataatsimeeqatigiinnissamut aggersarpavut, tassani utoqqaat ilaqutaallu 16-18-init missaat takkupput.

Tassani Utoqqaat Illersuisuata Allattoqarfiata pilerinneqarnera suliasallu Allattoqarfimmi ulluinnarni

suliasartakkavut pillugit ataani atsiortoq saqqummiivoq. Tamatuma kingorna inatsisileritooq aamma Utoqqaat Illersuisuata Allattoqarfiani allaffissornermi atorfilik, Najattaaq Mathiasen suliani pillugit saqqummiivoq, takkuttunullu katersortarfimmi inimi allami immikkoortumi inuit ataasiakkaarlugit inatsisitigit siunnersorneqarnissaannik neqeroorfigalugit.

13. Oqaluffimmi kommunillu allaffiani majorallaqanngilaq

Utoqqaat ilaqutaasalu ilaat ataatsimeeqatigiinnermi ajornartorsiutimik ilaannik saqqummiipput.


Peqataasoq arnaq 80-inik ukioqartoq niimi kipinegarnerata kingorna issiviammi kaassuartakkamik atuisoq illoqarfimmi tikikkuminaatsitsinerminut ajornartorsiutit pillugit oqaluttuarpoq.

Oqaluttuarpoq illoqarfimmi oqaluffimmi majoralliisoqarsimannginnera pillugu naalagiarsinnaanani. Aamma kommunip allaffianut majorallaqanngimmat isersinnaanngilaq.

Ataani atsiortup takuaa Upernavimmi Kommunip allaffianut majorallaqanngitsoq.

Oqaluffimmi aamma Kommunip allaffiani majorallaqartoqannginnera pillugu ajornartorsiut Aviâja Madsen-imut saqqummiuppara, taannalu aki-voq:

- Oqaluffimmut majorallaqannginnera ajornartorsiut ila-giit sinniisaan-



nut saqqummiussimatinnagu akiuminaatsippara, Aviâja Madsen allappoq, ingerlaqqillunilu:

- Issiavinnik kaassuartaakkanik atuisut Kommuni allaffianut isersinnaanginnerannut tunngatillugu majorallaliisoqarnissaa pillugu ukiut tamaasa qinnuteqaateqartarpugut, tassani innarluutillit pillugit inatsimmi § 5-imi³ allaqqammat, pisortani oqartussat issiavinnik kaassuartaakkanik pisor-

tat illuutaannut isersinnaanissaasa qulakkeernisaanut pisussaaffeqartut. Tamannali sulii piviusunngunngilaq. Kommunimut isaarissap qanoq isikkoqarnissaa Teknikkimut Ingerlatsivimmut nalilersorneqartussanngortinneqarpoq. Upernavimmi Kommuni allaffianut majorallammik titartaasoqarsimavoq.

14. Orsussarsiniunneqartarnerup imertaanneqartarnerullu naammagineqannginnerat

Innuttaasunik ataatsimiititsinermini innuttaasup 78-inik ukiullip innuttaasut namminerisaminnik illoqartut angerlarsimaffimminni orsussamik aalliunneqartarnerat imertaanneqartarnerullu pillugit kommunip malittarisassaanik naammagisaqannginnertik oqaatigaa.

- Ukiuunerani uuliamik imermillu amigaateqale-raangatta uuliamik ataasiarnermi 50 liiterimik imermillu 50 liiterimik aalliunneqarsinnaavugut. Ataasiarnermi taamaallaat uuliamik imermillu 50 liiterimik aalliunneqartarnerput pingaartumik ukiuunerani sullunarpallaaqimmat naammaginngilaq. Aamma ulloq ataaseq sioqqullugu nalunaartussaanerput uuliamik nunguutsigaa-ngatta ruujorit qerisinnaammata kingunerlorujus-suarsinnaavoq.

Qaammammut 350 liiterimik uulia tankertik immer-tittarpaat, ukiuuneranili ingammik unnuami amikkit-soornerminni dunkinik uuliamik pisariaqartsisinnaa-sarlutik.

Utoqqaat illersuisuata inatsisilerituuata innuttaasooq qulaani pineqartoq, malitseqartitsilluni septembarip 19-ani 2022 oqaloqatigaa.

Taanna nassuiaavoq kommunimi uuliamik aalliunneqarnissaminnut imertaanneqartarnissaminnulluunniit noqqaasaraluarnertik unitsiinnarsimagitsik. Tas-sunga peqqutaavoq illuminni imermut tankitaarsi-manertik, minnerunngitsumillu kommunimiit uuliamik aalliunneqarnissaminnik kommunimut noqqaasaraluarnerminni suliamut attuumassuteqanngitsunik oqaatsinik apuussivigineqartarnertik nuannarinnginnamikku.

- Taamaattumik immikkut uuliamik pisariaqartitsinitsinni dunkinik aalliunneqartalernissarput meeqqatsinnut isumaqatigiissutigisimavarput, taama innuttaasooq nassuiaavoq.

Pisariaqartitsinermini uuliamik imermillu 50 liiterimik aalliunneqartarnerup pillugu naammagittaalliut illaqtariinnut Ingerlatsivimmi pisortamut Aviâja Madsen-imut saqqummiuppara, taannalu allakkatigut aki-voq:

3 Inuit innarluutillit tapersersorneqarnissaannut Inatsisartut inatsisaat nr. 13, 12. juni 2019-imeersoq § 5. Pisortat illuutaat atororissaarutaataallu sapinngisamik ima aqqissuunneqassapput inuit innarluutillit isersinnaanissaat atuisinnaanissaallu qulakkeerneqassalluni.
Uani takuuk: https://inatsisit.gl/Lov?rid=%7b2698A112-7216-40DC-9405-E182888A5C8A%7d&sc_lang=kl-GL




- Angerlarsimaffinni ikiuisarneq pillugu malittarisassat Qaasuitsup Kommuniani atorineqartut sulii atorineqartutut isikkoqarpoq. Malittarisassaq taanna uuliamik imermillu aaliussisartup sulinera ajornannginnerutinniarlugu atorineqarpoq, Aviâja Madsen allappoq.

Nassuiaavoq:

- Atuisunut imermik uuliamillu sapaatip akunneranut arlaleriarluni aaliussisarneq pillugu malittarisassat sapaatini nalliuttunilu pilersuisinnaajumalluni atuutilersinneqarput. Tassa atuisut pisariaqartitsinerat malillugu uuliamik imermillu aaliussisoqarsinnaavoq. Kikkut qaqugulu imermik

uuliamillu aaliunneqartassanersut allattuiveqarpoq. Ilaat sapaatip akunneranut marloriarlutik aaliunneqartarput allallu sapaatip akunneranut pingasoriarlutik aaliunneqartarlutik.

- Taamaammat atuisunut ataasiakkaanut aaliussinissamut allattuiviup malinneqarnera pissutigalugu atuisut ulloq sioqqullugu inniminniisussanerannik oqarneq eqqoqqissaarsinnaanngilaq. Ukiuunerani issitsillugu pisariaqartitsineq malillugu uuliamik aaliussisoqartarpoq imertaassisoqartarlunilu.



15. Utoqqaat illuanni amigaatit pillugit malitseqartitsilluni oqaloqateqarneq

Upernavimmi utoqqaat illuanni aqutsisumut ulloq juulip 6-ani 2022 sianerpunga. Sara Karlsen paasissutissiivoq utoqqaat illuannut biilimik qaqugu pissarsi-sqassanersoq suli ilisimatinneqarani.

Sara Karlsen aamma ilisimatitsivoq elevatorimut kingoraartissat suli tikiingitsut, elevatorilu suli ator-sinnaanngitsoq, tamatumalu kinguneraa najugaqar-tut tallimat-arfinillit issiviammik kaassuartaqqamik atuisut utoqqaat illuannit suli anisinnaannginnerat, taakkulu taamaallaat aneerasaartarfimmi qullermi silaannarissarsinnaasut.

Sara Karlsen aamma paasissutissiivoq errorsiviit nu-taat kiisami ikkunneqartut, aappaa siullermik ator-neqarami aserorpoq.

- Panersiiviit marluk errorsiviillu ikkussuunneqaler-mata ajornartorsiungaatsiarpugut. Maskiinat eq-

gunnissaannut matunut matserfinnullu tattuum-mata ikkussuisut matu cementilu aserortertaria-qarsimavaat. Errorsiviup aappaa siullermik ator-neqarami ajoraluartumik aserorpoq, taamaam-mat tassunga motoori nutaaq massakkut pissarsi-arisariaqarparput.


Maannakkut allamik aamma ajornartorsiuteqar-pugut. Nillataartitsivik inimut nillataartitsiveqar-fimmut inissinneqartussaq eqqunneqarnissaminut tattuppoq. Nillataartitsivik ikkunniarlugu sullis-sisutta matu maannakkut peertariaqarpaat ce-mentilu aserorterneqarluni.

Sara Karlsenip aamma ilisimatitsissutigaa utoqqaat illuata ilassutaa nutaaq juunimi 2023-imi atorneqa-lerpat kalerrisaarutit nutaat ikkunneqartinnagit siar-ngit taarserneqarsinnaanngitsut.

Nuuk ulloq 30. september 2022

Inga Egede

Utoqqaat Illersuisuat





Aqarsuaq

